

460. տողից բաղկացած մի չափաբան պատմութիւն է, որ մենք Պատմական վիպասանութիւն անուանեցինք և որը ամփոփում է իւր մէջ Լանկթամուրի և այլ բռնակալների օրով՝ 1386 — 1422 թուերին Հայաստան տեղի ունեցած զարհուրելի կոտորածների և տառապանքների տխուր անցքերը՝ ժամանակակից երբեմն նաև ականատես մասնագրի ճշմարտագատում և սրտաշարժ նկարագրութեամբ: Չը նայած իւր չափաբերական ձևին և բանաստեղծական պարագաներին՝ այս երկը պատմական մեծ արժէք ունի ի միջի այլոց և այն պատճառով, որ նա նոյն ժամանակի պատմագիր Թոմա Մեծոփեցուց աւելի վաղ է գրուած և տեղ տեղ գեղեցիկ կերպով ստուգում ու լրացնում է սորան:

Մեր վիպասանութիւնը պահպանուել է Արդուին քաղաքի Լուսաւորչայ Հայոց եկեղեցում գտնուած բոլորազիր գրչագիր ձայնքաղ Գանձարանի մէջ՝ յիշատակարանի վերջը, որից իմացուում է, որ գրչագիրը գրուած է Վան քաղաքում՝ Հայոց ՀԺԱ = 1462 թուին — ուրիմն Խլաթեցու մահից 37 տարի յետոյ: Ես ընդօրինակել եմ տուել այս գրուածքը յիշատակի արժանի Հանգուցեալ Գրիգորիս Արքեպիսկոպոս Աղուանեանցի 1886 թ. ինձ ուղարկած «Տոմար արձանագրութեան» մի տետ-